

REINANAN NOBO DEN TUMBERITO

ORANJESTAD(AAN): Entertainment Center tabata bon ocupa diasabra pa e concurso anual di tumberito, cu un biaha mas a cuminza cu un tardanza di mas di un ora.

Pa un cuarto pasa di 7 a cuminza entona himno di Aruba pa cuminza e evento na cual a participa 10 cantante infantil y 8 cantante juvenil.

Den tanto infantil como juvenil e competencia tabata fuerte e aña aki, y por a ripara na final tambe cu e dos reinanan a perde nan corona y termina na di dos lugar.

Den infantil, Joselito Geerman cu a bini fuerte e aña aki cu su Chapolin den Carnaval compone pa Martin Quandus a bin ocupa di tres lugar, mientras cu e reina di tumberitonan, Sulaika Croes a termina na di dos lugar cu su Ata tumba pa bo, compone pa Erick Rincones.

E cantante cu a sorprende tabata Doris Franken cu "E barco di Carnaval" di Casin Giel, y kende a bin gana e corona di Reina infantil di Tumba 1993.

Mester menciona cu den e grupo aki, Quincy Hasham cu su "Cos di Mucha" a pone tur mucha den Entertainment Center y tambe adultonan haci cos di mucha cune. y si tabata tin premio pa cantante mas popular, e lo a ricibi esaki sigur.



Den e juvenilnan, Louisette Vlinder a bin termina na di tres lugar cu e tumba Bin Ban di Gos Oduber, mientras cu e reina Mariethy Werleman e biaha aki a termina na di dos

lugar cu su Bay Wak e di Casin Giel.

E corona di Mariethy e biaha aki a pasa pa Miriam Contreras cu a keda corona como reina juvenil di tumba 1993.



cu e tumba Barbie Doll compo ni pa Junior de Freitas.

Den e competencia di tumberito sinembargo no por bisa nunca cu tabata tin perdedor pasobra cada un di e participantenan tabata un ganador

caba cu e preparacion y e show magnifico cu nan ta

duna tur aña y ta keda finalmente na jurado cu ta escoge

e 3 finalistanan pa premiacion.